

Nefndarsvið Alþingis
Efnahags- og viðskiptanefnd
Austurstræti 8-10
150 Reykjavík

Reykjavík, 12. júní 2015

Efni: Umsögn Landssamtaka lífeyrissjóða um 786. mál á 144. löggjafarþingi 2014-2015, þingskjal 1400

Með tölvubréfi, dags. 11. júní s.l., barst Landssamtökum lífeyrissjóða (LL) til umsagnar frumvarp til laga um stöðugleikaskatt.

Eins og skýrt er tiltekið í 1. gr. frumvarpsins er markmið laganna „að stuðla að losun fjármagnshafta með efnahagslegan stöðugleika og almannahag að leiðarljósi.“

Unnt er að færa sterk rök fyrir því að gjaldeyrishöftin hafi verið nauðsynleg aðgerð þegar þau voru sett og til skamms tíma haft jákvæð efnahagleg áhrif. Langvarandi gjaldeyrishöft hafa hins vegar neikvæð áhrif á íslenskt hagkerfi og sú staðreynd hefur valdið forsvarsmönnum lífeyrissjóða verulegum áhyggjum. Í gjaldeyrishöftum búa lífeyrissjóðir landsmanna við takmarkaða fjárfestingarkosti sem getur leitt til lægri ávöxtunar og þar með einnig til skertrar afkomu lífeyrisþega. Takmarkaðir möguleikar til áhættudreifingar í eignarsöfnum lífeyrissjóða geta einnig valdið auknum sveiflum í ávöxtun og afkomu lífeyrisþega.


LL hafa reynt að leggja sitt af mörkum í umræðu og greiningu á gjaldeyrishöftunum með áherslu á áhrif þeirra á lífeyrissjóði. Leituðu samtökin til Dr. Ásgeirs Jónssonar dósents við Hagfræðideild og Dr. Hersis Sigurgeirssonar dósents hjá Viðskiptafræðideild Háskóla Íslands til að annast fræðilega greiningu á því viðfangsefni sem við okkur blasir vegna fjármagnshafta. Verki þeirra lauk með útgáfu bókarinnar Áhættudreifing eða einangrun?

Það er fagnaðarefni að nú sé komið fram frumvarp sem ætlað er að ná fram losun fjármagnshafta samhliða því að stuðla að efnahaglegum stöðugleika. Eins og athugasemdir við umrætt frumvarp bera með sér hafa stjórnvöld leitað til fjölda sérfræðinga til að tryggja eftir því sem frekast er unnt að losun hafta gangi farsællega fyrir sig með hagsmuni almennings að leiðarljósi. Hagsmunir almennings og lífeyrissjóða fara fullkomlega saman þar sem hagsmunaaðilar lífeyrissjóðanna eru fólk sem starfar eða starfað hefur á íslenskum vinnumarkaði.

LL lýsa yfir eindreginni von um að aðgerðir þessar gangi vel fyrir sig en samfara losun hafta er mikilvægt að styrkja sem flestar stoðir sem stuðlað geta að stöðugleika til framtíðar.

Virðingarfyllt

f.h. Landssamtaka lífeyrissjóða



Þórey S. Þórðardóttir, framkvæmdastjóri